

## MARTARS ...

*Siôr Diretôr,*

*di ce ch'ò ài podût lei, mi semèe che lui noi vebi fregul di stime par nissun di chêi che nus governin. J disarai ch'al è ancje facil criticâ stant difûr. Ch'al cjali cun onestât ce vite ch'a fasin ju aministradôrs di un cumun o, piês ancjmò, chêi plui in sù. Sinpri indenant, mai un lamp di polse, critichis e mormorazions di ogni bande, nancje ch'a fossin une bande di bandîz. J semeje une biele vite cheste? In font a puartin la crôs, e une crôs pesante, par ducju. No saressial miôr, invessit di criticâju, daur une man par puartâ indenant la barache? Furtune che la storie e fâs justissie. Ancje chêi ch'a si batevin pal Risorgjment e àn scugnût patî e murî par une cause sante. Dopo ju àn valorisâz. Ch'al ciri di sei plui costrutîf. Mandi.*

*Angela C. - Codroip*

Il so discôrs al mertares tre dîs par podêj rispuindi a dut. O cirarai di fâle plui curte e clare ch'al sei pussibil. Riguart `e stime pai pulitics, no soi nè il prin nè l'ultin a no vê stime. No jè colpe mê e nancje no si vin metûz dacordo. Ch'a provi a domandâ cjase so ce ch'a pensin di cheste barache e po' an sintarâ di sac e di pignate.

Riguart `e vite ch'a fasin, afârs lôr. O sai jò che nissun no si tire da bande e, se si gjave, al è dome parceche lu àn parât fûr! Gjesù Crist, ch'al ere un galantomp, al à penât e sorepenât par puartâ la crôs par tre oris e al è colât tre voltis, cun dut ch'al ere Diu. Chêi ch'a dîs jê, a fuarce di puartâ la crôs, e àn duc' metût sù panse e vile e in trente e passe agns no son colâz nancje une volte, ma nus àn faz colâ nô. Cheste e jè la veretât e no pò dineâle.

In merit ai martars dal risorgjment, mi tocje dâj un'âtre grande delusion. Sàe chêi «martars» che si studiave a scuele, tipo i fradis Bandiere, Anite te pinete di Ravene, Garibaldi eroe dai doi monz, chel ch'al tirave la craçule in ghigne al nemî, chel dal «tirem innanz» e «anìn indaûr» e vie? Ju àn faz martars chêi ch'a vevin dut l'intares a fâju passâ par martars. Se la Glesie e à srarît il so lunari, l'Italie e vares adiriture di brusâ il so «santorâl»! Se saves ce lingjeris ch'a erin cualchidun! Atrichè martars! E à reson jê, siore Anzule, che la storie e fâs justissie. Vedarà ce ch'a disaràn di chê gubie chi! Sul jessi custrutîf, mi pâr che netâ la cragne e seti une robe positive. Ansit, la prime robe di fâ. Par chel e sares ore che lessin fûr dai pîs, par disfetâ la stale.

Zenâr 1979

Pre Antoni Beline